

Dufi Kock a duna Aruba un tesoro cu su buki Historia di Savaneta

Si mi tabata un homber di placa cu lo por a saca un miyon florin facil di mi saco y haci un bon obra cune sin un "kiek", mi lo a percura pa cada cas na Aruba tin un buki di "**Historia di Savaneta**", di e autor **Adolf "Dufi" Kock**.

Asina importante mi ta haya e buki aki pa nos comunidad y cu mi ta recomenda tur hende pa trata di haya un ehemplar pa nan coleccion di buki. No ta 'sina 'sina bo ta haya un hoy a asina den bo man.

E palabranan di president di UNOCA **Sra. Nilda Koolman** den su discurso e anochi aki y e indicacion con UNOCA a yuda patrocina e buki; palabra di elogio cu el a ricibi di tur esnan cu a hiba palabra te na lesamento di e curriculum vitae di Dufi, tabata impresionante.



Nos por a mira den corantnan potretan di Dufi entregando su buki na **Gobernador** di Aruba y tambe na diferente instancia, pero e descripcionnan importante pa tur hende sa, tabata falta.

A tumami basta dia prome cu mi por a skirbi tocante e buki aki debi na actividadnan rond di "**Fiesta di San Juan**" cu Dera Gay y scolnan, tambe cu e Mundial cu a haci su entrada y cu te ainda mi no ta compronde cu na Aruba no ta papia di Ghana, Uruguay, Spaña y Paraguay.

"**Historia di Savaneta**", ta un buki cu ta describi tur aspecto di **Savaneta** completamente y cu cualquier persona cu lese lo siña masha hopi di dje.

Mi a conta un total di **135** topico tocante cual el a elabora, un mas tanto cu otro, sin laga nada cu ta relaciona cu **Savaneta** afo.

E anochi di presentacion mi a sinta mira e hendenan presente.

Bunita tabata di mira **Sra Eulalia de Cuba-Koolman**, mihor conoci como **Mathilda** di Boddie, di **105** aña di edad, kende hunto cu pastor **Hercules** entre otro cu a bautiza e buki.

Dedicacion di e buki ta na **Sr. Eloy "Loy" Koolman**, un savanetero musico y culturista cu ta un di e orguyonan di **Savaneta**, tambe na **sr. Eregino Ras**, otro musico grandi veterano di nos isla, tata di ex president di parlamento **Mervin Wyatt Ras**.

Sr. Eregino Ras no tabata por tabata presente pero hopi di e presentenan tabata tin su nomber den boca e anochi aki.

Tres nomber menciona aki di personanan cu a yuda hopi den informacion na Dufi, y den e buki lo mira tambe e lista di esnan cu a colabora cune y di tur su fuentenan.

Locual mi a aprecia tabata con **Savaneta** a sostene nan autor **Dufi Kock**.

Mi a haya falta di tur e caranan di custumber cu ta presenta na **Biblioteca Nacional di Aruba** y na departamento **Arubiana** di Biblioteca Nacional ora di presenta bukinan.

E sosten cu Dufi a haya di "**su hendenan**" a tenemi contento.

Mas ainda con na final su "**fanaticonan**" di **Savaneta** tabata para den rij pa cumpra buki y ricibi autografo di e autor den nan.

Bo ta sinti e **admiracion cu tabata tin pa Dufi**.

Dufi a conta con 4 aña largo el a traha riba e buki aki y mi tin cu bisa cu 4 aña ta sin conta e dianan, simannan, lunanan y añanan di haci anotacion y busca datonan, compara esakinan cu realidad di historia y te finalmente cuminza traha riba e buki.

Mi a keda sumamente contento dia mi a tende cu e buki ta cla pasobra mi tabata sa di e "**dolor**" cu Dufi tabata tin ansioso pa yega e dia di presentacion.

Cuanto biaha nos no a E-mail otro riba asuntonan cu pe ta importante, of pa mi ta importante pa sa y asina tabata intercambia hopi y masha poco via telefon.

Si mi tuma e 135 tereno, topico of aspecto den e buki manera mi a menciona ariba, mi por bisa cu loke a resalta den e buki riba mayoria di e aspectonan tabata: "**Savaneta** tabata e prome....; **Savaneta** tabata tin e prome.....; E prome.... a tuma lugar na **Savaneta** y masha sorprende e lesador ta keda cu e "**PROME** nan" di **Savaneta** riba masha hopi tereno.

Bo ta lesa nan y den bo mes bo ta bisa: "**Arubianonan, lesa e cos aki; lesa e historia aki pa bo sa di dje; hobennan, ata un di e bukinan importante tocante nos historia cu bo mester lesa pa conta bo yuinan y nietonan mañan.**"

Den tur esaki mi no a menciona mes e cantidad di potretan. Si no ta **100** sigur, ta mas cu **100**.

Mi a conta te 60 y ainda tabata falta cantidad mas a bay.

Potretan cu ta tira nos den pasado y esnan cu no sa di e pasado ey ta siña di dje pa medio di e potretan. Mi no a escoge ningun parti di e buki pa skirbi di dje, pasobra si mi cuminza cu un mi lo hayami ta copiando henter e buki.

Tur locual tin den e buki a cuminza cu un celebracion: "**Conmemoracion di 50 aña di existencia di Misa sagrado Curazon**".

Pesey tambe un parti hopi bunita y interesante tabata relaciona cu existencia di e parokia, **cuminsando na 1881** cu a traha un kapel na cas di **Pedrito y Rinchi Winterdaal** unda actualmente **Maris Stella** ta situa, cual tambe a sirbi como un scol y a haya e nomber "**San Hose**", manera Dufi a relata.

Nos por lesa di tur e pastooran y religiosonan cu a traha na **Savaneta**, laikonan y personahenan di importancia cu a traha pa e misa y parokia, mira potretan di e misanan, personahenan y otroan.

Di un a bin e otro te cu Dufi a haye den e situacion di percura pa mas tanto posibel di historia di **Savaneta** ta documenta y el a logra grandemente cu esaki tambe.

Mi por bisa: "**Pabien Dufi**", tambe "**danki Dufi**" pero esakinan lo ta masha poco pa por expresa ki obra grandi Dufi a presenta pa nos isla cu "**unda nos historia ta cuminza**".

Juby Naar

